



BARINGKUAS

REBOLUSIONARIO A DIARIO TI UMILI ITI CAGAYAN VALLEY

TAWEN 1998 BLG 4

ISYU ITI OKTUBRE - DISIEMBRE 1998

LINAON

EDITORIAL: Dawdawaten ti agdama a kasasaad ti napartak a panagabante..2

ARMADO A DANGADANG: Dakkel a balligi ti nagun-od ti rebolusionario a tignayan iti Cagayan-Apayao iti nagkallabas.....6

TIGNAYAN TI MANNALON: Lablabanan dagiti masa iti Vizcaya-Isabela-Quirino ti awan gessatna a panaggamrud ti daga..... 14

DAMDAMAG.....17

SEKSION YBANAG: Mekalima nga Parte na Rebolusionario nga Annuttulan ta Reforma ta Davvun.....29

KOMIKS: Tano.....31

KULTURA: Pangmabayagan a Gubat.....32



Dalanen ti Maika-31 a Tawen ti Partido iti Dadakkel nga Addang

MANIPUD ITI PANGREHION NGA organisasion ti Partido Komunista ti Pilipinas (PKP), nabara a kablaaw kadakayo amin iti maika-30 anibersario ti natan-ok ken natured a Partidotayo.

Rambakantayo dagiti napapateg a balligi iti naglabas a tawen ken dagiti gun-odontayo iti sumarsaruno. Saantayo nga ikkan ti lugar ti panagkampante. Pagbalinentayo nga inspirasion dagiti balligitayo tapno napigpigma ken naregregta pay nga agpursige iti rebolusionario a pannakidangadang.

Ti naglabas a 30 a tawen ti mangted kadatayo ti nayon pay a tibker ken kumpiansa iti panagdaliasattayo iti sumarsaruno pay a tawen ti rebolusion. Dagiti kapadasan a positibo ken negatibo iti trabaho a masa ken trabaho a militar. Dagiti kaammuan a pinagreggetan a maawatan kadagiti kolektibo a panagadal ken indibidwal a panagbasa iti Marxismo-Leninismo-Maoismo ken kadagiti napapateg a dokumento ti Partido. Dagiti naimbalitokan nga adal a naadaw kadagiti paglalagom ken panagdillaw ken panangdillaw-iti-bagi. Dagitoy ti pundasiontayo iti panangsango kadagiti rebbengen a naited kadatayo.

Saantayo nga ibain a dimmanontayo iti maika-30 a tawen ti panagrebolusion. Ipagpanakkeltayo ketdi. Gapu ta pammaneknek daytoy a ti PKP ket natibker ken naan-anay nga agserserbi para iti pannakawayawaya ti umili ken dasig. Ken saan a paguyod ken paabak iti nadumaduma a panangallilaw, panangallukoy ken panangikuspil ti pigsa't militar dagiti reaksionario nga agar-ari a dasig. Natibker pay ketdi ti determinasiontayo a rebbeken ti kabusor ken itakder ti sosyalista a gimong.

Manangallilaw ken manangdadael ti kapanunotan nga ipaspasaknap dagiti agar-ari a dasig. Kunada, "nabayagen ti rebolusion ngem saan pay a nagballigi. No talaga nga agballigi dayta, idi koma pay."

Nabaybayag pay ti panaglaban idi ti burgesia tapno rebbeken ti piudal a panagari. Ti immuna a nalatak a panaglaban ti burgesia kontra iti piudalismo a kangrunaan nga imbagi ti simbaan, ket idi labanan dagiti Protestante ti simbaan a Katoliko idiy Alemanian idi 1523.

Mapangngeddeng a naagaw laeng ti burgesia ti bileg pangpulitika idiy Inglatera idi 1832, iti pannakaipasa ti Gakat iti Reporma. (Linaon ti gakat dagiti prinsipio ti burges a demokrasiya.) Bassit pay ti 30 a tawen a napalabastayo kumpara iti 309 tawen a rebolusion ti burgesia iti Europa idi.

Saantayo nga agdanag, saantayon a danunen ti 309 tawen. Gapu ta nakadakkelen ti krisis ti kapitalismo. Ti met Partidotayo a mangidadaulo iti rebolusion ket tartarabayan ti Marxismo-Leninismo-Maoismo, a kaaabantean a teoria iti sangalubongan ita. Ken maad-adawtayo dagiti adal iti pannakidangadang.

Ngem talaga a gagangay a dumalantayo iti proseso a manipud bassit ket dumakkel, manipud iti nakapsut ket pumigma. Bayat a dagiti kabusor, manipud iti tukad a napigma ket agturong iti panagkapsut.

Kadatayo a napudno nga agserserbi iti umili ken iti dasig, saantayo nga agsingsingir iti tunggal lumabas a tawen. Uray pay ngarud ibukbuktayo ti sibubukel a biag, uray pay dagiti annaktayo ket

isagsagana tapno masigurado nga ibukbokda met ti laing, pigsa ken biagda para iti natan-ok a panggep a punasen ti pananggundaway ti tao iti padana a tao.

Dalanentayo ti maika-31 a tawen ti Partido iti dadakkel nga addang.

Apay a dadakkel nga addang? Kunatayo siguro, di met idi panawen ti biddut a linia nga estratehiko a kontra opensiba (SCO) ket dadakkel ti inaddangtayo? Saan. Idi panawen ti SCO, indungpartayo ti bagitayo iti pader.

Dadakkel nga addang ti rumbeng nga aramidentayo gapu ta nairuttayo nga ig-iggeman ti umno a linia. Babaen iti umno a linia a pang-ideolohia ken pangpulitika, makapagpapisga ti Partido kas abante a destakamento. Ti Hukbo kas pudno a buyot ti umili a mangrebberbek kadagiti kabusorda. Ken ti organisado a masa a lumawlaw ken umun-uneg a makonsolida kadagiti tay-ak gerilia.

Madi ti maysa a linia, kas iti SCO, no iyad-adayonatayo iti balligi. No pakpakapsuten ken pabpabassiten pay ti siguden a dinanontayo a pigsa. Isu a manipud idi 1987, nangrugina a bimmaba ti bilang ti base ken organisado a masa, aktibista, kameng ti Partido ken mannakigubat ti NPA. In-inut metten nga

immadayo dagiti masa kadayo.

Kabayatanna, umno ti maysa a linia no itulodnatayo iti panagpigsa ken panagdakkel, nga isu ti addang-addang a mangiyas-asideg

kadayo iti balligi. Rumbeng nga agresulta ti umno a linia iti aktual a panagdur-as dagiti trabaho — panagdakkel ti puersa, panaglawa ti matigtignayan nga aglalaon iti ngumatngato a tukad ti minimum a rebolusion agrario. Rumbeng a mangted kumpiansa ti umno a linia iti panagaddang iti dadakkel.

Dadakkel nga addang ti rumbengtayo nga aramiden. Tapno masungbatan ti dawat ti obhetibo a kasasaad. Napartak ti panagsuek ti

ekonomia ken nakakaskas-ang ti kasasaad dagiti datin nga agrigrigat a masa nga anak ling-et. Karurrurod dagiti umili ti manangikuspil a galad ken korupsiyon iti amin a sangay ti reaksionario a gobierno.

Lallalo pay nga umad-adu dagiti mannalon nga awanan bukod a daga. Dagiti dati nga adda dagana ket ag-agawan ti reaksionario a gobierno babaen kadagiti mananggamrud ken manangallilaw a proyekto ken patakaran. Ti Industrial Forest Management Agreement (IFMA). Ti Certificate of Ancestral Domain Claim (CADC). Ti Certificate of Land Ownership Award (CLOA).



DADAKKEL NGA ADDANG TI RUMBENG TAYO NGA ARAMIDEN. TAPNO MASUNGBATAN TI DAWAT TI OBHETIBO A KASASAAD. NAPARTAK TI PANAGSUEK TI EKONOMIA KEN NAKAKASKAS-ANG TI KASASAAD DAGITI DATIN NGA AGRIGRIGAT A MASA NGA ANAK LING-ET. KARURRUROD DAGITI UMILI TI MANANGIKUSPIL A GALAD KEN KORUPSION ITI AMIN A SANGAY TI REAKSIONARIO A GOBIERNO

Ken ti kababaruan a gimik a Community-Based Forest Management.

Iporporklosen ti Land Bank dagiti naka-Certificate of Land Transfer. Kagiddanna, nalalawa a lugar ti saksaklawen dagiti ganggannaet a kompania ti panagminas, a dumanon iti 75 tawen ti panangkurimes iti daga tapno agakup iti minas.

Ti nangato nga interes iti pautang. Ti nalaka a presio ti produkto dagiti mannalon. Dagitoy nga operasion dagiti komersiante-usurero-apo't daga ket mangag-agaw kadagiti salda a daga dagiti nakurapay inggana't akintengnga a mannalon.

Siguden a kurang ti trabaho. Adu pay ti naikkat iti trabaho iti gobierno ken kadagiti pribado nga establisimiento. Sigud metten a nganngani awan ti serbisio ti gobierno kadagiti mannalon. Iti panagablat ti krisis iti pinansia a nanggunngon iti ekonomia, nagbalin pay a sero ti serbisio ti gobierno. Nalawag a naimatangan daytoy manipud idi panawen ti El Nino inggana kadagiti naudi a nagsasaruno a bagyo.

Nasaknap ti panagtakaw, panagholdap ken panagtulisan. Dagiti taraken ti militar wenno dagiti militar mismo ti promotor kadagitoy. Ekspektaren pay a kumaro dagitoy gapu iti kinarigat ti biag.

Duapulo ket lima a ribo a pisos ti balor ti maysa a nuang nga arador itattan kumpara iti walo ribo a pisos idi tengnga't dekada sitenta. Sangapulo ket lima a ribo ingga't P19,000.00 ti gastos iti panagtalon iti maysa nga ektaria kumpara iti P1,500.00 idi tengnga ti dekada sitenta. Kumpara idi 1998, 32 sentimos laengen ti balor ti pisos.



**IDAULUAN DAGITI MASA ITI
PANNAKIDANGADANGDA KONTRA KADAGITI
AGAR-ARI A DASIG. TAPNO ADDANG-
ADDANG A MAGUN-OD DAGITI NAINDASIGAN
KEN PANGKAGIMONGAN NGA INTERESDA.
IYABANTE TI TRABAHO A MILITAR A
MANGREBBEK KADAGITI KABUSOR TI UMILI.
DAGIToy TI KONGKRETISASION TI
PANGGEPTAYO A PAGSERBIAN TI UMILI**

Rumbeng a sanguentayo ti nairut a dawat dagiti masa nga idauluan ida iti pananglabanda iti kasasaad a pangkabiagan (a nagbalinen a kasasaad ti pannakatay). Responsibilidad ti tunggal komite ti Partido iti teritorio nga iyaplikar ti linia ti Partido kadagiti partikular a pannakidangadang dagiti masa. Iti kasta, agtultuloy nga umasideg ken arakupen dagiti masa ti pangkabuklan a linia ti Partido, ti baro-a-tipo a nailian demokratiko a rebolusion.

Idauluan dagiti masa iti pannakidangadangda kontra kadagiti agar-ari a dasig. Tapno addang-addang a magun-od dagiti naindasigan ken pangkagimongan nga interesda. Iyabante ti trabaho a militar a mangrebbek kadagiti kabusor ti umili. Dagitoy ti kongkretisasion ti panggeptayo a Pagserbian ti Umili.


Dadakkel nga addang ti aramidentayo gapu ta dakkel a balligi ti nagun-odtayo iti naglabas. Nalpastayon ti inkeddeng ti Nailian a Dadaulo ti Partido a maikadua iti dua a tukad a dinanon ti Maikadua a Naindaklan a Tignayan ti Panagilinteg — ti panangsango kadagiti kamkamali ken pagkurkurangan a naggapu iti tukad rehion.

Nalpas idi 1997 ti paglalagom iti Viscaya-Isabela-Quirino (VIQ). Nalpas met idi 1998 ti paglalagom iti Cagayan-Apayao (CAPA) iti 19 tawen ti rebolusionario a panagtignay sadiay. Nakaadawtayo kadagiti adal a positibo ken negatibo.

Iti kabuklanna, nailintegtayon ti kannawan ken “kannigid” a kamkamali nga awit ti linia nga SCO. Naipakattayon dagiti puersa a gerilia ken naiurnos ti latag dagiti sona a gerilia, a mayannurot iti konsepto ti Komite Sentral ti Partido iti panangbukel iti hukbo ti umili ken dagiti tay-ak gerilia. Nagun-odtayo ti maysa a tukad ti panangpunno kadagiti pagkurkurangan iti teoretikal a panagadal tapno maawatan ti napasamak iti naglabas a 29 tawen ken madillaw ti simmiasi a linia ti SCO. Ken rimmegta manen ti trabahotayo a pangpulitika.

Dadakkel nga addang ti masapultayo tapno makaabante, makarekober ken lallalo pay a makapagpapigsa. Daytoy ti ur-urayen dagiti masa, dagiti puersa, dagiti kadre ken kameng ti Partido.

Kayatda nga umabante ti rebolusion, ken umabante a naparpartak. Kayatda ti agirusuat kadagiti taktikal opensiba ken tumarabay iti panagtignay ken pannakidangadang dagiti masa. Kayatda ti lumaban ken addang-addang a rebbeken ti kabusor iti nadumaduma a tay-ak ti trabaho.



Kapada met laeng ti tao ti rebolusionario a tignayan iti rehion. Iti dadakkel nga addang wenno ehersisio, sumaysayaat ti suplay ti dara iti sibubukel a bagi. Tumibtibker dagiti masel. Ken al-alerto ti panagpampanunot. Ti dadakkel nga addangtayo ti mapangngeddeng tapno mailinteg ti pul-oy ti konserbatismo. Ti tao no agbayagbayag ket lallalo a kumapsut. Kasta met ti rebolusion. Ti nabayag unay a panagtalinaed daytoy iti depensiba wenno panangibbet iti panagbuelo ket kaipapananna’t pannakaabak.

Masapul a kanayontayo nga isayangkat ti opensiba iti ideolohia, pulitika, organisasion ken militar. Bayat a saantayo liwliwayan ti estratehiko a balanse ti puersa, nga agpappapigsatay’ pay laeng ken lumikliklik kadagiti mapangngeddeng ken gasgasan a labanan. **B**

(PASET DAYTOY TI MENSAHE TI PANGREHION NGA ORGANISASION TI PKP ITI CAGAYAN VALLEY ITI MAIKA-30 ANIBERSARIO TI PARTIDO.)

Dakkel a Balligi ti Masa, Hukbo ken Partido iti Cagayan-Apayao

*Interbiu kenni KA
SILAY SILANGAN,
Kagawad ti Komiteng
Tagapagpaganap ti
Komiteng Rehion ti
Partido iti Cagayan-
Apayao iti nagpalpas a
panaglagom ti rehion
itay Hunio 1998*



BARINGKUAS (B): Ania ti inrussuatyo a panaglagom itay naglabas?

SILAY SILANGAN (SS):

Dakkel a balligi ti nalpas a panaglagom nga inrussuat ti Komiteng Rehiyon (KR) ti Cagayan-Apayao idi Hunio 1998. Naragup ken naadaw ditoy dagiti adal iti rebolusionario a kapadasan ti rehion. Padas daytoy dagiti

rebolusionario a masa, hukbo ken Partido iti Cagayan-Apayao. Panawen 1977 ti rugi ti rinagup agingga iti tawen 1996.

B: Ania ti kaipapananna daytoy a panaglagom iti masa, hukbo ken Partido iti eryatayo? Ania ti pakainaigan daytoy iti Maikadua a Naindaklan a Tignayan ti Panagilinteg (IDKP) a nairugi idi 1992?

SS: Ti Komite Sentral ti Partido Komunista ti Pilipinas ket linagomna ti tinaray ti panagrebolusion-tayo iti intero a pagilian manipud 1980 agingga't 1992. Impakitana a dakkel ti nagkamaliantayo iti panangiggem iti linia. Simmiasitayo iti husto a linia. Mayor a kamalitayo ti adbenturismo militar ken insureksionismo ti ciudad.

Tapno mailinteg dagitoy, inrussuat iti sibubukel a pagilian ti IDKP. Linawag manen nga ti irusrussuat-tayo ket baro a nailian demokratiko a rebolusion babaen ti pangmabayagan a gubat ti umili. Ken ti panangkubkob ti ciudad manipud kaaw-awayan. Teoria a Marxismo-Leninismo-Maoismo ti usarentayo a tarabay ken ti prinsipio a demokratiko sentralismo iti panagtaray ti organisasion.

Ngem saan a makaanay nga addan ti kastoy a paglalagom ti KS. Kasapulan met nga kitaen ti nagbalin a paset ti rehion kadagitoy a kamali ken panagsiasi iti linia. Nagipatungpal ti Partido iti rehion kadagiti kamali a linia ken patakaran a naggapu iti sentro ti daulo. Kasta met nga ninayonanna ken pinadur-asna pay daytoy a kamali a linia ken patakaran.

Dagitoy ti kinita iti paglalagom - dagiti partikular a paset ti rehion iti panagsiasi iti linia.

Dakkel ti kaipapananna daytoy a paglalagom iti



"REGULARISASION" TI NPA: maysa a pormasion ti batalion

masa, hukbo ken Partido iti rehion. Ditoytayo a maisilpo dagiti dadakkel a saludsod no apay nga immatras ti rebolusionario a tignayan. Ken no apay a dagidi a tawtawen a linagom ket kuna ti masa a "sabsabali metten ti hukbo, saan metten a kas idi damo."

Maipuesto ti masa ken hukbo dagiti saan a nalawag a pasamak iti naglabas. Mawarwar dagitoy babaen iti naun-uneg pay a panagadal a nakabasar iti umno a basaran a prinsipio ti panagrebolusion.

Napateg daytoy a paglalagom para iti masa, hukbo ken Partido tapno iti sumaruno a panawen ket nairut a mapagiggeman dagiti adal. Ket saanto manen nga agdalan kadagiti kamali a napadasan.

No mailinteg a nalaing dagitoy a nagkamalian, dumuras met laeng ti rebolusion ket magun-odto ti masa a magungundawayan ken maikuskuspil ti balligi ti rebolusion.

B: Iti tay-ak ti armado a dangadang, ania dagiti nalatak nga adal ditoy?

SS: Nasaknap ken nasagedsed a pannaki-dangadang a gerilia nga addaan lumawlaw ken

umun-uneg nga organisado a base a masa ti umno a linia kadaytoy a panawen iti abante a tukad ti estratehiko a dependsiba. Kadaytoy a linia, maiyasidegtayo ken makaramuttayo iti masa a mannalon nga isu't kangrunaan a puersa ti rebolusion.

Naregget a trabaho a masa ken panangidur-as iti rebolusion agrario ken pannakidangadang a gerilia ti rumbeng a pagiggemantayo kadaytoy a tukad ti gubattayo. Isaganatayo ti



NPA Gerilia: Saan laeng a panglaban, pangpropaganda ken pangproduksion pay



nalawa a masa ken ti hukbo kadaytoy a panawen. Imbes a linia nga estratehiko a kontra-opensiba (SCO) nga isu't pinagiggemantayo. Nangyeg daytoy ti adelantado a regularisasion a nangisina kadaytoy iti masa.

Dadakkel a pormasion ti nabukel iti naglabas, kas kadagiti kompania ken batalion. Nagirussuat kadagiti adu ken dadakkel a taktikal nga opensiba a

nangdungpar met iti daddadakkel ken mas napigpigsa a kabusor. Sinanay met ti hukbo iti kas panagsanay ti reaksionario a militar. Ken pinaadu ti istap militar kadagiti nagsasaganad a tukad. Taktika a pangregular, posisional a gubat, saan a gerilia ti impakattayo.

Napait a pannakaabak ti nasagraptayo gapu ta tinutopantayo dagiti

dadakkel a pormasion ti kabusor. Mas ad-adu a puersa, kadre ken mas daddadakkel a panagpursigi iti trabaho a militar ngem ti agtultuloy a panagpalawa ken panangpatibker iti base a masa ti tinalmegantayo. Nabennat ken nagasgas ti kabaellan ti hukbo ken base a masa.

Taktika a gerilia ti masapul nga usarentayo

tapno mapagsisina ti napigsa a kabusor ket mairussuattayo dagiti taktikal nga opensiba (TO) a kabaellantayo nga ipagballigi.

Babaen iti pannaki-dangadang a gerilia, isaganatayo pay dagiti rekisitos para iti nangatangato a tukad ti gubat. Ti panagitakder kadagiti organo ti bileg a pangpulitika ken dagiti rebolusionario nga organisasion masa iti nalawa a saklaw. Ti panangbukel kadagiti yunit ti hukbong bayan iti tunggal ili. Tukad-tukad a panagsagana ken panagurnong iti pigsa ken kabaellan ti Partido, hukbo ken base a masa ti kasapulan. Iti daya a panawen, makadanontayto met laeng iti nangatangato a tukad ti gubat ti umili - a pakairussuatan ti regular a natignay a pannakigubat malaksid iti gerilia.

BAR: Iti tay-ak ti trabaho iti intar ti masa, kasano a limmukay ti petpettayto kadagiti prinsipio iti panagorganisa?

SS: Ti dua a prinsipio iti panagorganisa - ti panagsanggir ken panagtalek iti masa ken solido a panagorganisa - ti nairut a pagiggeman. Babaen iti daytoy, mapagkaykaysa ken maisagana ti masa iti pannakidangadang laban kadagiti kabusor iti dasig. No saan a solido ti pannakaorganisa ti masa, saan a maidur-as ti rebolusion.

Ngem iti linia nga SCO, makaanayen a tumigtignay ti masa para iti pakasapulan ti hukbo ken para iti ligal a mobilisasion.

Napapartak a naitakder dagiti organisasion masa ken awtomatiko nga naingato ti tukadda iti Komiteng Pangorganisa (KP) agingga iti tukad ili ken probinsia nga organisasion. Uray iti panagitakder ti People's Revolutionary Government (PRG) ket napapartak a naitakder.

Narigatan ken nadagsenan dagiti organisador iti hukbo, dagiti aktibista ken ti masa kadagiti nangangato ken dadakkel a responsibilidad.

Naibbetan ti solido a panagorganisa. A ti kasapulan koma ket ti panagpundasion kadagiti rekisito kas iti SI-CA (pangkagimongan a panagsukimat ken panagusig ti dasig), edukasion masa, panagsanay kadagiti aktibista, panangidur-as ti rebolusion agrario, panagsagana ti ligal nga

organisasion masa, panagsagana iti panagitakder ti Partido nga agidaulo iti organisasion masa.

Nakettel ti inisiatiba ken demokrasia ti masa gapu iti adbenturismo militar. Dadakkel dagiti plano iti organisasion masa uray dagiti mobilisasion para kadagiti ligal nga aksion masa ken panagsuporta iti hukbo. Maibaba lattan dagiti patakaran ti Partido ken hukbo para iti masa. Uray dagiti nairussuat nga aksion militar a nagsasagadsad, kadagiti lawlaw ti balbalayda wenno purpurokda ken uray sadinno ditan ti nakairussuatanna. Saanen a naikonsidera ti pagbiaganda ken dagiti pagtaenganda.

Agtalek ken agsanggir iti masa. Parukbosen ti inisiatibada iti panagibaklay kadagiti responsibilidad. Ipaawat ti kinapateg ti panangbukelda ti bukodda a pigsa tapno arakupenda ti rebolusion ket agreggetda nga agtignay.

Nairut a panangpetpet ken panangipatungpal iti

Ti dua a prinsipio iti panagorganisa - ti panagsanggir ken panagtalek iti masa ken solido a panagorganisa - ti nairut a pagiggeman. Babaen iti daytoy, mapagkaykaysa ken maisagana ti masa iti pannakidangadang laban kadagiti kabusor iti dasig. No saan a solido ti pannakaorganisa ti masa, saan a maidur-as ti rebolusion.

linia nga antiipudal ti tulbek dagiti trabaho iti kaawayan: kangrunaan a mangnamnama iti napanglaw a mannalon, mangmangged talon, nababa a nagtengnga a mannalon ken guyoden dagiti nagtengnga a mannalon tapno maniutralisa inggana't maallukoy ti nababaknang a mannalon, gundawayan dagiti risiris iti nagbaetan dagiti nalawlawagan ken despotiko nga apo't daga. Isina dagiti apo't daga tapno marebbek ti bilegda a pang-ekonomia ken pangpulitika.

Ngem iti naglabas, limmukaytayo ditoy ket saanen a sinigurado a dagiti laeng basaran a masa ti maipauneg ken mangidaulo iti organisasion masa. Nakaserrek dagiti nagtengnga

a mannalon ken sumagmamano a nabaknang a mannalon. Saan a husto a nabukel ti pigsa ti basaran a masa.

Limmukay met ti panangiggem iti rebolusion agrario. Naipangruna ketdi ti panagpatignay iti masa para iti panagsuporta iti hukbo (regularisasion) ken ti panagmobilisa kadakuada para kadagiti dadakkel a ligal nga aksion masa a dimmanon agingga't Manila.

B: Ania met ti padas iti trabaho kadagiti sentro ti ili ken ciudad?

SS: Naregget a trabaho a masa ken solido a panagorganisa. Daytoy met laeng ti nairut a petpetan iti trabaho kadagiti sentro ti ili

ken ciudad iti rehion. Panangbukel ti organisado a pigsa ti umili iti paaddang-addang.

Ngem nagaburan ti konsepto a pasagad ken napartak a panagorganisa ti umno a konsepto a solido a panagorganisa.

Saan a nasamay a naitakder ti nalawa ken nauneg a limer a tignayan kas natibker a duri ti naparang a tignayan masa. Nagtalinaed a naingpis ken nakapuy dagiti limer a grupo. Bassitda la ngaruden, napartak pay a nagasgas dagitoy iti panangiggem iti responsibilidad kadagiti kampania a masa.

Nagtalmeg iti panagirussuat kadagiti dadakkel ken natagari a naparang a tignayan masa a nakadireksion iti insureksion. Kanaigna met ditoyen ti panagsagana iti erya tapno agbalin a base ti partisano ken panagirussuat ti pannakidangadang a partisano.

Tapno mapatibker dagiti organisado a masa, kanayon a pagiggeman ti relasion ti edukasion,



Dua a rebbengen ti napateg a maipatungpal iti sentro ti ili ken ciudad: panangidur-as ti naparang ken demokratiko a tignayan masa ken suporta iti armado a pannakidangadang

panagorganisa ken panagpatignay a saan nga iti amin a panawen ket kampania a masa. Agtultuloy daytoy a ngumatngato a proseso iti panangbukel ti organisado a pigsa ti umili.

Dua a rebbengen ti napateg a maipatungpal iti sentro ti ili ken ciudad: panangidur-as ti naparang ken demokratiko a tignayan masa ken suporta iti armado a dangadang.

B: Kasano a ramuten iti ideolohia dagiti nagkamalian ken panagsiasitayo iti linia?

SS: Limmukay ti petpettayo iti pursigido a panagadal iti Marxismo-Leninismo-Maoismo. Narabaw pay ti teoretikal a kaammuan dagiti kadre ken kameng ti Partido iti panawen a naglabas. Isu a nakaserrek ti simmiasi a linia ken patakarana a saan a napauneg a napagadalan no umno kadi wenno saan. Kunatayo no panangpadur-as ken panangpapartak iti gubat dagitoy ngem saan met gayam. Isu a nagtitipon dagiti husto ken biddut a linia ken orientasion.

Rimmingbaw ti suhetibismo iti uneg ti Partido. Naglanga daytoy iti turongen a dogmatista, empirisista ken rebisionista.

Kayattayo a mapapartak ken nalaka a maiballigi ti gubat, sabali met a linia ti impatungpaltayo.

Kinopiatayo dagiti padas ti sabali a lugar ken pagilian

Tapno masigurado nga umno a direksion ti turongentayo, agadaltayo a nalaing kadagiti basaran a prinsipio ti Marxismo-Leninismo-Maoismo ken ipratikatayo dagitoy

uray no saan a dua a tukad a rebolusion ti linia dagitoy ket daytoy ti inrutaptayo kadagiti padastayo. Kasta met nga no ania ti kabuklan a rebbengen iti tukad sangapagilian ket isu metten ti kopiaen ken ipakat iti erya imbes a pagadalan no ania ti paset ti rehion a kabaellan nga ipatungpal basar iti agdama a kongkreto a kasasaad ken kabaellan iti erya. Pareho a dakkel ti kakurangan ditoy. Ti nauneg a panagusig iti kongkreto a kasasaad ket ditoy a pagadalan no ania ti annatup nga addangen ti husto koma nga inaramid.

In-inut a nabatin ti masa. Bimmassiten ti papelna iti armado a dangadang. Mas nagdependetayo iti pigsa ti armas ken hukbo laeng. Simmaknap ti puro militar a pannirigan imbes a ti masa ti pangnamnamaan iti panangiballigi iti gubat. Limmab-ay ti panagawat iti partikular a papel ti masa iti risiris iti dasig ken iti rebolusion.

Nagbukeltayo iti bukodtayo nga estratehia

ken taktika a nangpanaw iti estratehia ken taktika ti intero a pagilian. Ken nagpanggep nga umunan ti rehion nga agturong iti balligi. Gaputa napadakkeltayo ti panagkita iti kabaellan ti rebolusionario a puersa nga iti kasumbangirna, napabassit met ti panagusig iti kabaellan ti kabusor. Naiyanudtayo kadagiti rugi a balligi iti regta ti masa nga agtignay ken iti buelo dagiti taktikal nga opensiba nga indiaya ti nasayaat nga obhetibo a kasasaad.

Narabaw, maymaysa-a-bangir, dogmatista, empirisista ken mekanikal ti panagusigtayo iti taray ti pasettayo iti panagrebolusion iti rehion. Kasta ti sumadana ti bidduttayo iti ideolohia.

Tapno masigurado nga umno a direksion ti turongentayo, agadaltayo a nalaing kadagiti basaran a prinsipio ti Marxismo-Leninismo-Maoismo ken ipraktikatayo dagitoy.

B: Iti organisasion ti Partido, kasano met a

nagladawan ti nagkamalian iti pulitika ken ideolohia?

SS: Adda kagiddanna a panagsiasi kadagiti patakaran a pang-organisasion ti panagsiasi iti tayak ti pulitika ken ideolohia.

Gapu ta pinanggep a papartaken dagiti plano ti regularisasion, nalabsing met ti prinsipio ti demokratiko sentralismo ken kolektibo a panangidaulo.

Limtuad ti kamali a burukratismo, sobra a sentralismo, ultra-demokrasia ken liberalismo.

Naiyadayo ti Partido ken hukbo iti basaran a tukad nga agasikaso iti masa a kameng ken gawaing masa. Naiguyod kadagiti trabaho a pangmilitar, pang-istap ken dadduma pay a trabaho iti nangatangato a tukad imbes a talmegan ti panagidaulo kadagiti yunit a pangteritorio.

Naitransporma ti makinaria ti hukbo tapno agtalmeg iti trabaho a militar. Bassit a bilang ti nabati iti trabaho a masa. Naikonsentra dagiti ad-adu a kadre iti trabaho a pang-istap

ken pangmilitar. Napartak met a naingato ti tukad dagiti kadre gapu iti pannakabukel dagiti dadakkel a komite. Napuersa ti kabaelan dagiti

trabaho, adda dagiti kasasaad a saanen a maala pay ti opinion dagiti kagawad ti komite ken nababbaba a kolektibo. Maibaba lattan dagiti patakaran tapno maipatungpal.


Kasta met a dagiti resulta dagiti kumpe-rensia ket diretson a maipatungpal nga awan pay panagtalakay ken panang-apruba ti plenum ti komite. Uray ti panagaramid ti bukod nga estratehia ken taktika ket ultra-demokrasia (iti relasion ti KR iti nangatangato nga organona).

Limmukay ti panangiggem iti abante a destakamento a galad ti Partido a bukuklen dagiti kaaabantean nga elemento ti dasig a proletariado.

Adda dagiti yunit ti hukbo a saan a komprehensibo a nakaidaulo ditoy ti Partido ket nagresulta ti pannakapukaw ti yunit ken/wenno nakaaramid iti kamali iti intar ti masa.

BAR: **Kasanoyo a ragupen dagiti amin nga adal iti paglalagom nga inrussuatyo?**

SS: Adu dagiti nangun-



Ti dalan ti rebolusion ket narikut ken adu ti likkona. Dagiti positibo ken negatibo nga padas iti naglabas ket agbalin a tarabay iti panagtignay. Nalawag ti panggep ti rebolusion - ti panangiballigi ti baro demokratiko a rebolusion ken ti turongen daytoy a sosialismo

kadre aglalo ket kurang met ngarud ti naited a teoretikal ken uray pangpulitika a pundasion kadakuada. Kasta met a nag-espesialisa dagiti kadre kadagiti naited a trabahoda ket nalimitaran ti komprehensibo a panagkita ken panagadal kadagiti kasasaad kasta met iti panagidaulo.

Tapno napartak a maipatungpal dagiti

odtayo a balligi kadagiti tawtawen a linagom. Ad-adu pay met laeng ti positibo kadagitoy.

Ngem dadakkel met dagiti kamali ken panagsiasitayo iti linia nga isu't nakaiduron iti panagatrastayo ken adu a didigra a nasagraptayo.

Ti Komite ti Partido iti rehion ket sipupudno a nangdillaw iti bagina kadagiti pasetna iti kamali ken panagsiasi. Inakona ti responsibilidad ti sibubukel nga organisasion iti rehion kas mangibagbagi iti Partido iti lugar.

Adu pay met laeng a kadre ken kameng ti Partido kasta met dagiti kumander ken mannakigubat ti nagtalinaed a nangiggem iti umno a linia ken nagtultuloy agingga ita iti panagrebolusion. Kasta met a lumawlaw dagiti masa a maor-organisa manen laban iti agdama nga estado.

Ti dalan ti rebolusion ket narikut ken adu ti likkona. Dagiti positibo ken negatibo a padas iti naglabas ket agbalin a tarabay iti panagtignay. Nalawag ti panggep ti rebolusion - ti panangiballigi ti baro a demokratiko a rebolusion ken ti turongen daytoy a sosialismo. Daytoy ti masapul ti nalawa a masa tapno mawayaanda iti panagrigat ken pannakairurumen.

BAR: Iti panawen ti Maikadua a Naindaklan a Tignayan ti Panagilinteg , ania met dagiti nagun-od ken ania pay ti pagkurkurangan?

SS: Iti tukad ti 1993-1996, napagiggemanen ti tignayan ti panagilinteg. Ngem saan a golpe a nakailinteg gapu ta in-inot met ti pannakaawat iti esensia ti tignayan ti panagilinteg. Nagtultuloy ti panagbassit ti bilang ti puersa, erya ken trabaho gapu iti nakaro a saplit ti biddut a linia nga SCO. Ngem ketdi dimmur-asen ti kalidad ti puersa basar iti tarabay ti tignayan ti panagilinteg.

Rinugian a pinauneg ti pannakaawat kadagiti nagkamalian. Winarwar dagitoy ken inlaksid iti panunot, ugali ken praktika. Inikkaten dagiti kannigid a turongen iti panagtignay. Ngem limmatak metten ti kannawan a turongen iti trabaho iti intar ti masa, iti trabaho a militar ken uray iti trabaho kadagiti sentro ti ili. Adda panagsarimadengtayo nga umabante uray no ipalubos ti kasasaad. Konserbatismo ti awag ditoy.

Akikid la unayen dagiti matigtignayantayo imbes a nalawlaw koma pay ta kabaelan met ti tunggal yunit. Bumayag dagiti tukad ti organisasion masa nga intakdertayo ket saanda nga dagus a maital-o iti nangatngato numanpay dati da metten nga organisado iti naglabas. Saan pay a

naipursigi a nalaing ti rebolusion agrario. Nabayagen a panawen nga awan ti nairussuat a taktikal nga opensiba. Saan pay a nadusa dagiti napeklan a kabusor ti masa kasta met dagiti dadakkel ti basolna iti rebolusionario a tignayan. Nabuntog ken pakutkot ti panagorganisa-tayo para iti naparang ken nalawa a tignayan masa ken saantayo a nausar dagiti ligal nga organisasyon para iti panagorganisa, panagpatignay ken panagited ti nalawa a panagpropaganda ken panagadal.

Dagitoy dagiti kasapulan nga ilintegtayo iti agdama. Saantayo nga agsarimadeng iti panangidur-as ti rebolusion. Adda pay met naan-anay a bilang dagiti nalalaing ken natitibker a kadre ken kameng ti Partido kasta met dagiti kumander ken mannakigubat ti BHB. Isu a nagtalinaed ken agtultuloy a dumakdakkel ti base a masatayo. Adda naan-anay ken natibker a basaran ti panangiyabante-tayo iti agkakanaig a sangkap ti gubat ti umili kas ti armado a dangadang, rebolusion agrario, ken panangitakder ti base a masa. Paborable ti kasasaad para iti napartak a panagdur-as basar kadagiti nagun-oden a panagpursigi ti sibubukel a rebolusionario a puersa iti napalabas a tallo a dekada ti baro a demokratiko a rebolusion ti umili. **B**

**Asi pay ni Mannalon,
Awan Latta ti Dagana**

Gamrudenda aminen, isu a ti DAGA A PAGBIBIAGAN, ILABAN

URAY KASANO'T KAADU TI PASISTA A TROPA TI IGABOR TI REHIMEN ESTRADA, SAANDAN A MALAPDAN TI ARMADO A PANAGLABAN DAGITI MASA

MAIKADUA A PASET

Salda-Gatang, Komersion ken Asienda iti Patag

ITI NALAWA A kapatagan, rumigrigat met ti biag ti mannalon. Ad-adu ti awanan bukod a daga ken umaw-awat latta. Agtultuloy a mapalusposanda ti daga, uray ti sumagmamano nga adda bassit sanikuana. Isu nga umad-adu ngarud dagiti naan-anay ken panapanawen a makitegged ditoy.

Inkapilitan nga ilako, iyutang-kolateral wenno isalda ti mannalon ti bassit a bukodda a daga. Mapilitanda, lalo no gawat ken no adda dakkel a pakasapulanda. Ta kumarkaro met ngarud ti krisis iti pagilian, a sigud a gundawayan ti dadakkel nga apo't daga, komprador ken usurero iti lokalidad.

No naisalda, narigatda a mapasubli pay. Kadawyanen daytoy. Adda "salda-gatang" ken "salda-patay", nga isun ti nalaka a bayad ti daga. Adda pay nagbalinen a "salda-agnanayon", ta di mabayadan ti mannalon.

Kasano a maisubli ti salda, ni asendero metten ti agpatrabaho iti daga. Awan uray sangabukel a mais wenno irik a mabingay ti mannalon a sigud nga akindaga.

Sabali pay dagiti kuman, talon ken solar ti mannalon a naagaw, gapu iti land conversion ti gobierno, a sinaklaw metten ti dadakkel a proyekto ken negosio.

Kas ti sinakop ti "sports complex" ni Dy idi 1992-93 iti Ilagan; reforestation iti Diadi, Cordon, Ramon ken dadduma nga ili; subdibision, paglinglingayan ken pagkomersioan iti Santiago, Ilagan, Cauayan, Solano, Bayombong, Tuguegarao, Roxas ken dadduma pay a dadakkel

nga ili, nangruna kadagiti igid ti hawyey. Nakalawlaw pay a daga ti ag-agawen ni Enrile iti Gonzaga-Sta. Ana, a masakop ti Cagayan Export Processing Zone.

Iti patag a masarakan ti dadakkel nga apo't daga ken naglalawa nga asienda. Ta inagaw ni asendero ti daga, nga immuna a linuktan ken napadur-as ni mannalon.

Kas iti Hacienda San Antonio ken Hacienda Sta. Isabel (HSA-HSI) sadiay Ilagan, Isabela. Nalatak a pakakitaan iti agtultuloy a panagagaw, pananggundaway ken panagturay dagiti asendero iti pagilian - manipud panangkolonia ti Kastila ken simmukat nga imperialista a U.S., ginasut a tawenen ti napalabas.

Daytoy ti agtultuloy a lablabanan dagiti mannalon manipud pay kadagiti apong tayo iti unos ti nasurok 400 a tawen agingga iti agdama.

Nagkaykaysa manen a limmaban dagiti mannalon iti HSA-HSI idi 1979-81. Kadayta a tawen a nagturpos ti panagtagikua ditoy ti Tabacalera a kumpania ti Kastila. Ngem inted ni Marcos ti asienda kada Danding Cojuanco, Juan Ponce Enrile ken Antonio Carag, a nangbukel iti korporasion nga ANCA.

Gapu iti militante a panaglaban dagiti mannalon, a sinuportaan ti nalawa nga umili iti uneg ken ruar dagiti sona a gerilia ti NPA, napilitan nga immatras ti ANCA idi 1982. Napaay ti diktador a mangpapanaw kadagiti mannalon, nupay nakaro a ranggas ken militarisation ti inaramid dagiti pasista a militar.

Napilitan ni Marcos nga ipauneg iti programana a bogus a reporma iti daga ti HSA-HSI. Nagiwaras iti CLT idi 1982. Ngem awan napanglaw a mannalon sadiay a nakaturpos iti amortisation. Nganngani awan payen isakmolda, adda ket ngaruden maitinnagda nga amortisation ti daga?

Idi panawen ni Aquino agingga kenni Ramos, innalada ti naka-CLT a daga. Adu ti pinorklos ti Land Bank. Na-reklasipikasion ken rebaluasion ti daga. Naingato ti balorna. Ilaklako ti Land Bank dagiti posision ti mannalon iti asienda ita. "Gatgatangen" dagiti real estate developers, kas ti Fil-Estate, Rotary Sawmill ti

pamilia Dy, ken dadduma pay a pakabilangan ti 17 a dadakkel nga asendero.

Agburburek latta ti dara dagiti mannalon sadiay, nangruna iti agdama.

Linteg, "Reporma" ken Ranggas Laban iti Marigrigat

ITI KOLONIALISTA A Doktrina a Regalian ("linteg ti ari"), maibilang a "public land" amin nga awanan titulo a daga. A pagnumaran ti sumagma-mano nga agar-ari a dasig, a pangiserbian ti reaksionario nga estado kadagitoy a daga.

Awtomatiko a maibilang a kukua ti gobierno wenno "publiko a daga" dagiti amin a bakir, turod ken bantay - nga 18 digris agpangato ti bangkirig na. Awan titulo dagitoy, tax declaration laeng no dappatan ti mannalon, wenno "paabangan" ti gobierno kadagiti dadakkel a negosio.

Ubbaw ken pangallilaw laeng ti nadumaduma a programa iti "reporma iti daga" ken proyekto a "pangpadur-as" dagiti agsisinnukat a reaksionario a rehimen.

Umad-adu ngarud ti awanan ken maagawan iti daga agingga iti agdama, kas kada Ama Roque, Ka Joe, ken dadduma pay a marigrigat ti biagna a mannalon iti pagilian.

"Daksanggasatda" iti agdama a malapiudal a

Ubbaw ken pangallilaw laeng ti nadumaduma a programa iti "reporma iti daga" ken proyekto a "pangpadur-as" dagiti agsisinnukat a reaksionario a rehimen

gimong. Nabayagen a napaneknekan daya da Ama Roque. "Daga" laengen a naiselsel iti kuko ti makuna a bukodda, no ar-arigen. Ta ag-agawendan amin a naipundarda a daga. "Sanga-sapulan, sanga-saangan" pay laeng ti biagda. Ngem umun-uneg ti pannakailumlomda iti utang ken nakaro a panang-gundaway.

Sibubukel a makinaria ti reaksionario nga estado ti agserserbi iti agtultuloy a panagturay, pananggundaway ken panaggamrud dagiti dadakkel nga asendero ken komprador, a kakumplot dagiti imperialista a ganggannaet.

Linteg, proyekto, korte, pagbaludan, bangko, DAR, DENR, AFP, pulis, CAFGU, ken amin nga instrumento iti pangallilaw ken panagranggas ti usaren dagiti agar-ari a dasig para iti bukodda nga akikid nga interes.

Awan ngarud mauray ti mannalon iti reaksionario a turay iti kiddawda para iti bukod a daga, panagdur-as ken wayawaya. Masapul nga isuda mismo ti mangilaban ken manggunod ditoy.

Ngem kumarkaro ti panagranggas ti estado kadagiti marigrigat a mangilablaban iti karbenganda. Agtultuloy ti militarisation ken terorismo ti reaksionario nga estado kadagiti mannalon iti sigud a forest region iti Isabela, Vizcaya, Quirino ken Cagayan, manipud pay 1970s a rugit ti gubat ti mannalon ditoy.

Iti sakop ti Arimco, nagkampo ti 77 IB. Iti Casenan Dam, maysa pay a batalion ti PNP ti guardia. Naipalawlaw pay ditoy ti 71 IB ken 72 IB iti Aurora-

Iti nadumaduma a lugar, inlaban ti militante a tignayan dagiti mannalon a matagikuada ti daga, dappatan ken irupir ti karbenganda kadagiti mabalin a masukay a pasto ken konsesion, ken kumpiskaran ti sumagmamano a naranggas nga apo't daga a pimmanaw wenno dinusa dagiti buyot ti umili



Ecija. Sabali pay ti adu a Cafgu. Nakawaras dagiti tropa ti 21 IB iti lugar da Ama Roque. "Naibunubon" iti Ilagan agingga iti San Pablo ti 17 IB. Naigabur pay dagiti kampo ken tropa ti 50 IB, 41 IB, 45 IB ken 48 IB iti Cagayan-Apayao.

Sumaksaknap met dagiti pundamentalista a relihion. Ikasaba dagitoy nga "anusan ti mannalon ti rigatda". Butbutngenda ti mannalon nga agtignay wenno lumaok iti rebolusion. Kangrunaan a serkenda dagiti nasulineken a bario, a masaklawan ti dadakkel a negosio ken ti rebolusionario a tignayan.

Kanaig pay ditoy dagiti agsaksaknap a "kooperatiba" ken sinsinan NGO, kas iti Plan International, Silayan Cooperative ken PRRM. Nalawag ti papel dagitoy iti kontra-rebolusion - ti panagtiktik ken panagsaywar laban iti rebolusionario a tignayan, ken panagilako kadagiti pangal-allilaw a proyektoda iti umili.

Rebolusion, Sungbat ti Mannalon

NAKARKARO A RIGAT ti umili ti impaay ti "Philippines 2000" ni Ramos. Ita adda met karatula nga "Erap, para iti marigrigat" ti rehimen US-Estrada, bayat nga itultuloy ken naynayonna dagiti patakaran ti imperialismo.

Mamati kad pay dagiti mannalon?

"Adu a kari. Kada agsukat ti presidente. Para kano't pobre. Pui! Sa agawenda ti nabatbati pay a daga? Ditay itulok, annakko. Ilabantayo ti karbengan iti pagbibigangan a daga!" Rumrumsik dagiti mata ni Ama Roque.

Disididoda a mangilaban, iti amin a pamuspusan, iti karbenganda iti daga a pagbibiganda. Nairut met

ti petpetda kadagiti de-sabogda. Immunan a nag-NPA ti dadduma a kabataan iti barioda. Ad-adu pay kadakuada ti agsagsagana a sumampa. Makiin-innadalda iti kakadua ita.

Babaen iti nalawa ken natibker a panagkaykaysa ti mannalon ken makitegteged, militante a panagtignay ken pannakilaokda iti armado a dangadang, maidur-as ti rebolusion agrario, mailaban ti karbenganda iti daga ken in-inut a magibusan ti piudal ken malapiudal a pannakagundawayda.

Kas iti kapadasan tayo iti ag-30 a tawen a gubat ti umili, nagun-od ti adu a mannalon dagiti benepisio - panangibaba iti abang ti daga ken dadduma a ramit ti produksion, panangikkat iti usura, simple a kooperasion, panangingato iti presio ti apit ken tangdan dagiti makitegteged. Napasardeng dagiti agagaw iti daga, naisubli ti inagawda a daga ti mannalon.

Iti nadumaduma a lugar, inlaban ti militante a tignayan dagiti mannalon a

matagikuada ti daga, dappatan ken irupir ti karbenganda kadagiti mabalin a masukay a pasto ken konsesion, ken kumpiskaran ti sumagmamano a naranggas nga apo't daga a pimmanaw wenno dinusa dagiti buyot ti umili.

Napasardeng ti panagtulisan ken dadduma pay a riribuk, bayat a naisaknap ti rebolusionario nga urnos ken turay ti umili kadagiti lugar a natakderan iti rebolusionario nga organisasion ti masa ken matigtignayan dagiti gerilia.

Natalna ken nainkalintegan a risrisuten dagiti aktibista a masa, dagiti riri iti daga ken dadduma pay a nagbabaetan dagiti umili iti bario.

Ngem mapukpukaw dagitoy a nagun-od ti mannalon, kadagiti lugar a kumapsut ti panag-organisar ken militansiada, aglalo iti sango ti nakarkaro a pasista a ranggas ken militarisation ti reaksionario a rehimen.

Masapul ngarud nga itultuloy nga ipingetda ti armado a dangadang.

Masapul a maawatanda ken iturongda ti armas iti pudno a kabusor ti umili - iti panangrebbek iti makinaria ti estado dagiti dadakkel a komprador-asendero.

Masapul a gibusan ti umili ti turay, monopolio iti daga ken sanikua, putden ti panangirurumen ken panang-gundaway dagiti dadakkel a burgesia komprador, apo't

Agpayso ti kuna ni Ka Sayyap. Iti balligi ti dua a tukad a rebolusion laeng a naan-anay a marisut ti mano-gasuten a tawen a problema ti mannalon iti kaawan bukod ken di-umanay a daga a pagbiaganda, iti kumarkaro a pannakagundaway ken rigatda

daga ken imperialista, nga ibagbagi ita ti reaksionario a rehimen US-Estrada.

"Isu a saantay' paallilaw wenno agbuteng. Masapul nga ituloytay' ti lumaban, Ama. Lumaok tayo iti rebolusion!" intag-ay ni Ka Sayyap ti iggemna a riple, kas panangdagup iti karirikna ken pangngeddeng met da Ama Roque.

Agpayso ti kuna ni Ka Sayyap. Iti balligi ti dua tukad a rebolusion laeng a naan-anay a marisut ti mano-gasuten a tawen a problema ti mannalon iti kaawan bukod ken di-umanay a daga a pagbiaganda, iti kumarkaro a pannakagundaway ken rigatda.

Daytoy ti dangadang a mangwayawaya iti dasigda a mannalon ken iti pagilian - a mangipaima ti turay iti pulitika ken ekonomia iti nalawa nga umili **B**



Rinambakan, Maika-30 a Tawen Ti PKP



Saanen a
 marebbek ti
 kabusor ti
 Partido babaen
 iti bukodna a
 pigsa — daytoy
 ti pinaneknekan
 ti naglabas a 30
 a tawen ti
 rebolusion

TALLO A DEKADA NGA
 imbukbok dagiti agar-
 ari a dasig ti
 kapipigsaan a pungtotda,
 marebbekda laeng ti Partido
 Komunista ti Pilipinas (PKP)
 ken ti idadauluanna nga
 armado a rebolusion.
 Inrusuatda ti kadadakkelan,
 karurungsotan ken
 kababayagan nga operasion
 militar. Intupakda pay ti
 martial law.

Ginasut a ribo a puersa
 militar ken napipigsa nga
 armas ti pinatignay ken
 inusarda. Inwayatda amin a
 pamuspusan iti psywar ken
 panangallilaw. Tinulungan
 pay ida dagiti ispesial nga
 ahenteda nga
 pagpampammarang a
 komunista.

Kalpasan ti 30 tawen,
 nalawag a napaay dagiti
 imperialista ken aso-asoda.

Kabaliktadna, agpabpabaro't
 pigsa manen ti Partido ken
 rebolusion. Maysa pay a
 pammaneknek ditoy dagiti
 nairusuat a nadumaduma a
 taripnong iti sangapagilian
 tapno rambakan ti maika-30
 anibersario ti Partido idi
 Disiembre 26.

“Sisasagana ti Partido a
 mangirusuat ti gubat ti umili
 uray iti sumaruno a 100
 manen a tawen,” kinuna ni

Gregorio "Ka Roger" Rosal, nailian a tagapagsarita ti Partido. Imbagana daytoy kanaig iti umadani a maika-100 nga anibersario ti pannakidangadang ti umili a Pilipino kontra iti imperialismo a U.S. inton 1999.

Iti Cagayan Valley, naangay dagiti taripnong iti maysa a larangan gerilia iti daya ti Cagayan ken iti tallo a larangan gerilia iti Isabela-Vizcaya- Quirino. Adda met naangay iti Puraw a purok. Ken uray iti Metro Manila a no sadinno ket addada puerisa ti rehion sadiay. Ginasut a masa ti napalaok kadagitoy a selebrasion.

"Dalanen ti maika-31 tawen ti Partido iti dadakkel nga addang." Daytoy ti pangkabuklan a panawagan ti pangrehion nga organisasion ti Partido iti mensahe a binasa iti nadumaduma a taripnong. Binilinan ti pangrehion a liderato ti Partido dagiti kadre ken kameng, kumander ken mannakigubat ken aktibista a masa nga agirusuat kadagiti taktikal opensiba ken militante a pannakidangadang ti masa.

Iti maysa a larangan gerilia iti Isabela, naangay ti taripnong bayat a madama ti tignay ti kabusor iti saan nga adayo a lugar. Agarup 50 rebolusionario a masa ti immatendar. Nagsisinublat a nagbitla dagiti kadre ti Partido, mannakigubat ti NPA, lider

mannalon ken lider kabataan. Nangngegan dagiti kansion, daniw ken pluta.

Impabuya ti maysa a drama a mangipakpakita iti panagpabaro't pigsa manen

**"DALANEN TI
MAIKA-31 A TAWEN TI
PARTIDO ITI
DADAKKEL NGA
ADDANG." DAYTOY TI
PANGKABUKLAN A
PANAWAGAN TI
PANGREHION NGA
ORGANISASION TI
PARTIDO ITI MENSAHE
A BINASA ITI
NADUMADUMA A
TARIPNONG.
BINILINAN TI
PANGREHION A
LIDERATO TI PARTIDO
DAGITI KADRE KEN
KAMENG, KUMANDER
KEN MANNAKIGUBAT
KEN AKTIBISTA A
MASA NGA AGIRUSUAT
KADAGITI TAKTIKAL
OPENSIBA KEN
MILITANTE A
PANNAKIDANGADANG
TI MASA**

.....

dagiti organisasion masa, rebolusion agrario ken taktikal opensiba. Pinagsasanguan dagiti makan a binalon dagiti masa.

Nakurang a 50 met a masa ti napalaok iti taripnong iti maysa pay a larangan gerilia iti Isabela. Iti programa, nagsisinnukat ti kapadasan dagiti kameng ti Partido, NPA ken masa. Impabuya dagiti hukbo ti drama kanaig iti magugundawayan a kasasaad dagiti mannalon, terorismo ti militar ken pannakidangadang dagiti masa. Addada pay kankanta, iskit ken daniw a kanaig iti 30 tawen ti nabannuar a panagrebolusion.

Iti taripnong a naangay iti maysa nga apartment idiyay Metro Manila, tinalakay dagiti puerisa iti Cagayan Valley, nga adda sadiay kadayta a panawen, ti mensahe ni Armando Liwanag, Dadaulo ti Komite Sentral ti Partido. Nagtalakayda met iti memorandum manipud iti pangrehion a liderato. Pinasingkedanda manen ti pangngeddengda nga agrebolusion. Nagsisinublatda a nagkanta ken nagbitla.

Sadinno man ti ayanna. Kasano man ti kaadu ti trabahona. Kakuyogna man dagiti kolektibona wenno agmaymaysa. Impangruna ti tunggal kameng ti Partido ti aldaw ti Disiembre 26 tapno lagipen ken patibkeren ti panangiggemna iti esensia ti pannakaitakder ti Partido: ti panangrebbek iti imperialismo ken amin a klase ti pananggundaway ti tao iti padana a tao. **B**

Antipasista A Tignayan Masa, Pumigpigsá Iti Isabela

**Gapu iti militante
a tignayan masa,
kongkreto a balligi ti
nagun-od dagiti umili
iti Isabela**



NAPATEG A panagabante ti militante a tignayan masa iti Cagayan Valley ti napasamak iti naglabas. Nagtignay dagiti basaran a masa iti aw-away ken sumagmamano nga akintengnga a puersa. Sinupiatda dagiti panaglabsing iti karbengan a pangtao ti 21 IB, 77 IB, 17 IB ken dadduma pay a puersa militar ti kabusor. Imbulgarda iti publiko ken linabananda dagiti panagranggas, pammutbuteng ken pananglipit dagiti pasista a tropa kadagiti masa ken

panagpuorda iti balbalay.

Nagpartisipar dagiti umili iti mano a barrio iti Jones. Kasta met dagiti sumagmamano nga akintengnga a puersa kadagiti sentro nga ili iti rehion. Nagtignayda kadagiti naparang ken limed nga aksion masa ken propaganda maibusor iti pasismo. Kangrunaan nga imbulgarda ti 21 IB.

Pannakidangadang Ti Masa

NAGARAMID DAGITI masa a mannalon ken sumagmamano a

biktima ti pasismo iti petition ken delegasion. Simmilpoda kadagiti akintengnga a puersa kadagiti sentro nga ili. Nabukel idi maikadua a paset ti 1998 ti maysa a grupo a nakabasar iti panaglaban kadagiti karbengan a pangtao.

Nairusuat ti maysa a fact-finding mission, kagiddan ti medical ken relief mission, iti Brgy. Dicamay Dos, Jones idi Nobiembre 19-21. Linaokan daytoy ti 40 a kabataan-estudiante, padi ken madre, abugado, doktor ken titser

manipud kadagiti sentro nga ili ken ciudad. Kasta met ti agarup 1,000 nga umili kadagiti apektado a bario.

Kalpasan ti fact-finding mission, naiyuli ti kaso iti panaglabsing kadagiti karbengan a pangtao ti 21 IB iti reaksionario a konggreso. Naaddaan ti panagdengngeg iti kaso (congressional hearing) kanaig daytoy.

Idi Disiembre 5, nairusuat iti Santiago City ti maysa a demonstrasion dagiti rinibo nga umili. Prinotestaanda dagiti ranggas militar iti Cagayan Valley. Nagserbi met daytoy a kas nasapa a pananglagip iti maika-50 anibersario ti Universal Declaration of Human Rights iti sangalubongan. Maysa kadagiti nagsarita ditoy ni Satur Ocampo, maysa a progresibo a lider. Idi man laengen nga adda naiyangay a militante nga aksion masa kalpasan ti mano a tawen.

Naibulgar iti lokal nga istasion ti radio ti isyu dagiti karbengan a pangtao. Kasta met ti napasamak a protesta-selebrasion dagiti umili idi Disiembre 5. Ken ti resulta ti fact-finding mission iti Jones.

Balligi Ti Tignayan Masa

GAPU ITI nagkaykaysa ket militante a panagtignay maibusor ti



PUMIGPIGSA
MANEN TI
MILITANTE A
TIGNAYAN MASA,
KAGIDDAN TI
PANAGPABARO'T
PIGSA TI
PANNAKIGUBAT A
GERILIA

militarisasion, nakagun-od dagiti umili iti sumagmamano a balligi.

Iti Brgy. Villa Bello, Jones, napilitan dagiti pasista a tropa nga agbayad iti danyos perhuisio kadagiti familia a biktima iti panagpuorda iti balbalay.

Iti fact-finding, medical ken relief mission iti Brgy. Dicamay Dos, Jones, nasurok 300 a familia ti nabenepisarian iti panagagas, panagparut iti ngipen, akupangtura, literasia ken relief goods.

Napatpateg pay ngem dagitoy, pimmigsa manen ti pakinakem dagiti nalawa a masa nga ilaban iti naparang a panagtignay dagiti karbenganda a pangtao. Ngimmato manen ti panagtalekda iti bukodda a pigsa ken organisado a panagtignay.

Nagbalin met a dalan daytoy para iti panagtinnulong ken nagkaykaysa a panagtignay dagiti basaran a masa ken akintengnga a pueras. Timmulong dagiti sumagmamano nga akintengnga a pueras kadagiti mannalon a nabiktima dagiti militar. Tinulonganda met dagiti rebolusionario a naaresto ita a tawen, agdama a nakabalud kadagiti kampo militar ti AFP ken nakaidarum iti kaso a

kriminal.

Saan a nalimitar ti militante a tignayan masa iti antipasista a balabala ti pannakidangadang. Naingato daytoy iti antiimperialista ken antiapiudal a linia. Naisilpo ditoy dagiti problema ken rebolusionario a panagtignay dagiti mannalon tapno risuten ti kinaawan wenno kinakurang ti daga, panaggamrud ti daga ken dagiti pananggundaway a piudal ken malapiudal.

Naisilpo ti papel dagiti pasista a tropa ken estado iti panagturay ti dasig nga apo't daga, dadakkel a burgesia kumprador ken lokal a komersiante-usurero.

Naisilpo met dagiti pannakairurumen, pannakagundaway ken kinarigat dagiti masa iti

imperialista a globalisasion ken kadagiti patakaran ti aso-aso a rehimen. Kas iti deregulasion, liberalisasion ken pribatisasion, a nangipaay iti nakaro a krisis iti pagilian. Kas iti dagiti kapitalista a gangannaet.


Opensiba Iti Pulitika

GAPU ITI pannakaibulgar ti kinaranggas daytoy kadagiti masa, nadepsiba iti pulitika ti 21st IB. Atiddog ti listaan ti krimen daytoy a "best battalion" iti kinaranggas. Saan laeng nga ita no di sipud pay idi maideploy daytoy iti rehion idi maudi a paset ti dekada 70.

Naibulgar ti 21 IB iti panaginkukuna daytoy a kas manangtulong iti umili. Ti

pannakaibulgar daytoy kadagiti un-
uneg a bario ket nagwaras kadagiti sentro nga ili ken kapitolio.


Agpakarigat dagiti opisialna a mangpilit kadagiti masa a biktima ti



ranggas militar tapno iyatrasda ti naiyuli a darum idiy reaksiunario a Konggreso.

Nalabit a mapilitan ti AFP nga iyakar iti destino ti 21st IB. Iti kasta ket makaliklik daytoy ken ti sibubukel a kontrarebolusionario nga armado a pueras iti pungtot ken panaglaban dagiti umili.

Masapul nga itultuloy ken pairtengen pay dagiti umili ti panangsupiatda iti 21st IB ken iti amin a ramay ti kinaranggas ti rehimeng U.S.-Estrada. Itultuloyda nga isilpo ti antipasista a pannakidangadang iti antiimperialista ken antiapiudal. Agpursigida iti naparang ken limes a panagtignay. Kagiddan ti irusrusuatda a militante a pannakidangadang, suportaranda met ti pannakigubat a gerilia nga irusrusuat ti New People's Army.



Managbaybay-a a Gobierno, Nakarkaro ngem iti El Nino ken La Nina



Awan serserbi ti rehimen Estrada para kadagiti masa a biniktima dagiti kalamidad

KIMMARO TI BISIN dagiti umili gapu iti nagsasaruno a kalamidad. Kas ti El Nino (tikag). Ken ti “asawa”na a La Nina (dadakkel a layus ken bagyo). Ngem no utoben, nakarkaro pay a kalamidad ti ipapaay kadakuada ti managbaybay-a a gobierno.

Gapu iti tikag iti naglabas, adu a mannalon ti saan a nakamula. Naggiinnagawda iti bassit a padanum. Bassit ti naapitda ken adu’t nalugi kadakuada. Inngato met ti abang ti padanum.

Adu pay ti saan a makabayad iti utang. Adu

kadakuada ti inkapilitan nga agisalda ken agilako kadagiti ramitda iti produksion. Kas ti daga wenno nuang. Tapno adda pangalaan ti maipakan kadagiti pamiliada. Adu pay ti nakitegged iti sabali nga ili. Lallaloda pay a nailumlom iti utang.

Iti ekonomia ti intero a pagilian, nagsuek ti sektor ti agrikultura iti nasurok pito a porsiento gapu iti tikag.

Superbagyo, Superpananggundaway

NADOBLE TI kalbarioda idi dimteng dagiti superbagyo nga Ilyang ken Loleng. Dinadael dagitoy ti

adu a mulmula ken apit. Ken nalayus iti ginasut a ribo nga ektaria ti taltalon. Agarup a nasurok P1.8 billion ti gatad ti nadadael a produkto ken imprastruktura ditoy Cagayan Valley.

Kalpasan dagiti superbagyo, pinakaro pay dagiti usurero ti pananggundawayda kadagiti mannalon. Linimitaranda pay ti panagpautang. Nagikeddengda met ti nadaddadagsen a kondision.

Lallalo met a linaklaka dagiti komersiante ti presio dagiti produkto ti mannalon. Kas ti mais. Manipud iti sigud a P6 tunggal kilo,

nagbalin metten a P3 - P4 tunggal kilo. Kasta met ti irik. Manipud P8 -P9 tunggal kilo, nagbalin metten a P4 tunggal kilo ti "skin dry" ken P3.50 tunggal kilo no "reject."

Kagiddanna, ngimmato ti presio dagiti gagatangen ken serbisio. Kimmaro ti kinaawan ti trabaho. Adda kasilpona daytoy a panagkaro met dagiti krimen. Kas ti panagtakaw ti nuang, arado ken uray dagiti babassit a ramit a mabalin a mailako.

Managbaybay-a a Gobierno

AWAN PULOS INARAMID ti rehimen Estrada kadagitoy a panagkaro ti pananggundaway ken kriminalidad. Ken awan met ti naan-anay ken umno nga inaramidna tapno matulongan dagiti biktima dagiti kalamidad.

Sakbay pay ti isasangbay dagiti kalamidad, masapul koma nga addan inaramid ti gobierno a panagsagana. Ngem awan!

Permi a kurang dagiti ramramit ken imprastruktura a pang-agrikultura a mangsalaknib koma iti produksion. Nakabasbasit pay ti serbisio a pangkagimongan. No adda man imprastruktura, agkurkurang la ngaruden, saan pay a mamanmantenar.

Adu a barrio ti awanan kalsada. No adda man, nalubo agingga't tumeng ken narigat a pagnaen. Lallalo kadagiti lugar iti

interior wenno selsel. Narigat ngarud nga iruar dagiti produkto dagiti mannalon.

Peligroso met ti suplay ti padanum. Sakbay pay dagiti kalamidad, adun a kanal ti irigasion ti mabaybay-an latta. Ngannganin saan a mausar. Uray koma adda kalamidad no sigud a natarimaan dagitoy, saan koma a kasdiay ti kakaro ti pannakadidigra dagiti mannalon.


Kurang kano ti pondo ti gobierno tapno saganaan ti isasangbay ti kalamidad. Umuna, agpayso a kurang ti pondona para iti kalamidad. Gapu ta saan met a prayoridad ti gobierno ti interes dagiti masa.

Maikadua, saan met a napan iti pagsayaatan dagiti masa ti pondo a naipaay para iti kalamidad. Nagdiretso ketdi daytoy iti bulsa dagiti naruker nga opisial ti gobierno.

Saan la ngarud a nakapagsagaman, awan pay naan-anay nga inaramid ti gobierno kalpasan dagiti didigra.

Maysa a milyon a pisos laeng ti "intulong" ti gobierno iti tunggal nadidigra a probinsia. Kadaytoy a "tulong", dua a kaban a bagas ken 20 a lata

1998 FILIPINO OF THE YEAR (PDI)*



Presidente Joseph Estrada: *man of the year para iti burgesia, didigra para iti masa*

ti sardinas laeng ti napan iti tunggal bario. Ken sumagmamano laeng a bario ti naikkan kadagitoy, nupay adu a bario ti nadangran.

Iti dadduma a lugar, gapu ta saan a makaanay ti relief iti sibubukel a bario, inpa-raffle laengen dagitoy dagiti opisiales ti barangay. Kas iti napasamak idia Sta. Isabel, Ilagan.

Idia Echague ken Jones, saan a kinayat dagiti masa a mapan alaen ti bagida a relief idia sentro ti ili. Kasano ngamin, nanginggina pay ti gastoenda a plete a mapan ken agsubli iti sentro ngem ti relief ti gobierno.

Nangted met ti Department of Social Welfare and Development (DSWD) iti P300,000 para iti ginasut a ribo a tao a biktima ti

kalamidad iti intero a Rehion 2. Badyet kano para iti kandela, sardinas ken pansit. Para kadagiti masa, saan a tulong, no di ket pananginsulto, ti kastoy a kabassit a gatad.

Saan a “pangmerienda” ti kalkalikaguman dagiti tao. No di ket rehabilitasion dagiti nadadael a mulmula, balbalay, ramramit ti produksion ken pamedped bisin. Ti nasao a “tulong” ti DSWD ket kasla asin nga inyaprus iti naapges a sugat dagiti marigrigat.

Kinapudnona, saan nga agpakpakaasi dagiti umili tapno tulungan ida ti rehimen Estrada. Dawdawatenda laeng ti rumbeng a para kadakukada. Umili, lallalo dagiti mannalon, ti mangbibig iti gobierno ken gimong. Umili, lallalo dagiti mannalon, ti agparparnuay iti kasapulan ken mangpakpakan iti gobierno ken pagilian. Umili ti paggapapuan iti binilion a pisos a badyet ti gobierno, babaen iti buis ken bannogda.

Ngem apay a no iti panawen ti nakaro a pannakadidigra, pangmano a sakmol laeng a bagas ken sardinas ti “maiparanod” ti gobierno kadakuada!

Rehimen Estrada, Didigra Para Iti Masa

SAAN LAENG A managbaybay-a ti gobierno iti interes dagiti masa.

Supsupiatenna pay ketdi dagiti interesda. Kitaentayo

laengen ti tinawen a badyet ti gobierno. Nakabasbassit a paset daytoy ti nakaiturong para iti pang-emerdyensi ken pangkagimongan a serbisio. Idinto a nagbayagen a nakaay-ay-ay ti kasasaad dagiti masa. Idinto a sipud pay idi punganay, tinawen nga adda bagyo ken layus a mangdiddidigra iti nalawa nga aw-away.

Ti kadadakkelan a badyet ti gobierno ket saan nga agserserbi kadagiti masa. No di ket kadagiti manggungundaway ken mangrangranggas kadakuada. Mapan a pagbayad utang kadagiti ganggannaet a bangko ken kapitalista. Ken kadagiti pasista a tropa.

Saan laeng a dayta. Nakabasbassit la ngaruden ti maipaay para iti serbisio ken pang-emerdyensi dagiti masa, kurkurakoten pay daytoy dagiti opisial ti gobierno. Kas iti napasamak iti kalkalpas a nakakaro a bagyo, a no sadinno ket imbalsa dagiti burukrata ti dakkel a paset ti pang-emerdyensi a pondo.

Nalawag met a pinaneknekan ti rehimen Estrada no ania’t kangrunaan a gapu ti nakaro a kalamidad kadagiti masa. Saan nga ti aglawlawti makagapu. Inaramid mismo daytoy ti gobierno!

Kitaen laengen ti dakkel a layus a limmapunos iti nalalawa a kataltalonan, nangdadael kadagiti pagay ken mais ken nangiyanud iti balbalay, eskuela ken pangtrabaho nga ayup iti CV. Aramid daytoy ti sanikua ti gobierno a Magat River Multipurpose Project (MRMP), a mano a daras a kellaat a

nagibulos iti danum. Impakita ditoy ti gobierno no sinno’t pudno a salsalaknibanna. Uray malmes dagiti mula, pagtaengan, nuang ken tao, mapaserbian laeng ti MRMP dagiti dadakkel a negosio iti kuriente!

Dinidigrana la ngaruden, suinitik pay ti gobierno dagiti umili. Kalpasan ti dakkel a layus, simmaruno ti panagbaba nga husto ti presio ti bagas ken mais. Ti sigud nga P8 tunggal kilo nga irik ket nagsuek iti P3.50-P5, idinto a nagngingina ti magatgatang.

Idiay Ilagan, Isabela, indarum ti Department of Environment and Natural Resources (DENR) dagiti masa a nakaalaw kadagiti troso a naiyanud iti layus. Ilegal a panagtagikua iti troso wenno ilegal a panagtroso ti inkaso kadagiti piman a mannalon. Kuna ti DENR, dagiti kano naalaw a troso ket masapul pay nga iparehistro.

Pinaneknekan ti kapadasantayo kadagiti naglabas a bagyo: nga awan manamnamatayo iti reaksionario a gobierno, gapu ta ti reaksionario a gobierno mismo ti mandiddidigra kadatayo.

Itakder ti bukodtayo a bileg pangpulitika iti nalawa nga aw-away! Daytoy laeng ti alternatibotayo iti maysa a managbaybay-a ken kontra-umili a gobierno. Daytoy ti dagus a panggeptayo bayat nga irusrussuat ti armado a pannakidangadang ken militante a tignayan masa. **B**

Martir Ti Rebolusion, Pinadayawan

**No awan dagiti naibukbok a dara ken ling-etda,
saantayo koma a nadanon ti agdama a tukad ti rebolusion**

KAS PANANGBIGBIG iti nabannuar a pannakidangadang ken sakripisioda, pinadayawantayo ti nasurok 10,000 a martir ken bannuar ti 30 tawen a nailian demokratiko a rebolusion iti Pilipinas. Inangay ti pammadayaw idi Nobiembre 30.

Inawagan a "Pammadayaw kadagiti Annak ti Pagilian," ti taripnong ket paset ti selebrasion iti Aldaw para kadagiti Bannuar. Nairusuat daytoy iti Film Center iti Unibersidad ti Pilipinas, Diliman, Quezon City.

Nadumaduma ti pannakatayda. Adu dagiti natay iti labanan. Adu met dagiti natay iti sakit bayat a lumalaok iti gubat laban kadagiti reaksionario a

puersa. Ken dadduma pay a makaigapu.

Adu kadakuada ti kumander ken mannakigubat ti New People's Army, ken kadre ken kameng ti Partido Komunista ti Pilipinas. Kasta met a pinadayawan dagiti pamilia dagiti martir ken bannuar.

Karaman kadagiti napadayawan dagiti nagtignay iti Cagayan Valley. Dagiti sumaganad ti sumagmamano laeng kadakuada:

- Crispin Tagamolila (Ka Cely)- maysa a teniente ti AFP a simmampa iti NPA; Commanding Officer ti REMO (Ganap na Yunit Gerilia); natay iti labanan idia Brgy. Dipanyong, Echague, Isabela idi 1972;

- Roger Baccud - taga-

Enrile, Cagayan; produkto ti tignayan ti kabataan-estudiante iti Tuguegarao sakbay ti martial law; natay iti labanan idia Penablanca, Cagayan idi 1972;

- William Begg - adda dara na nga Amerikano a nagadal idia Ateneo de Manila; natay iti labanan iti Magleticia, Echague, Isabela idi 1974;

- Fortunato Camus (Ka Norman), umuna a komisar a pangpulitika ti First Red Company idi 1971 ken kumander ti Second Red Company ti NPA idi 1973; natay idi 1975 idia Baler, Quezon kas kumander ti Red Detachment 5 a nag-ekspansion idia Nueva Ecija;

- Benito Tesorio (Ka Lito)- Taga-Jones, Isabela,



"NADAGDAGEN NGEM SIERRA MADRE TI MATAY PARA ITI PAGLIAN."

Kalihim ti Probinsia ti Isabela ken kameng ti Komiteng Tagapagpaganap ti Komiteng Rehiyon-Cagayan Valley (KTKR-CV) ti Partido; natay iti labanan idia Morado, Ilagan, Isabela idi 1975;

- Renato Astraquillo (Ka Ising), opisial medikal ti 1st Red Company, natay idia Sta. Filomena, San Mariano, Isabela idi 1975.

- Rock Lopez - Kalihim ti Seksion ti Eksplosibo ti Rehion; natay idi 1976;

- Carol Visaya (Ka Nita), taga-de Vera, Cauayan, kadre ti Umuna a Distrito ti Cagayan. Natay iti labanan idia Lasam, Cagayan idi 1979.

- Catalino Balmores (Ka Arman)- Taga-Isabela, simmampa iti NPA idi 1971; nagbalin a Kalihim ken Kumander ti Distrito 1 iti Cagayan; kameng ti Komiteng Tagapagpaganap ti Komiteng Rehiyon-Hilagang Silangang Luzon (KTKR-HSL)ti Partido idi 1977-79; nagbuis idia Lallo, Cagayan idi 1979;

- Leonida Nalapu (Ka Nida) -Taga- Villa Sanchez, San Guillermo, Isabela; kameng ti KTKR-HSL. Natay idia Amulung, 1979.

- Dr. Juan Escandor (Ka Inyong)- Daulo ti Medical Bureau ti Regional Operational Command ti NPA; nagbalin a Kalihim ti Distrito 3, Abagatan a Daya ti Isabela; kameng ti kalihiman iti KR-CV; natiliw ken pinatay dagiti pasista idia Metro Manila idi 1983;

- Joel Sibbaluca (Ka Vergel)- Vice Commanding Officer ti Military Secretariat ti Cagayan-Apayao-Ilocos Norte (CAIN), kameng ti KR-CAIN idi 1984; natay iti labanan idia Amulung, Cagayan idi 1984;

- Venerando Villacillo (Ka Miguel/Ka Ibarra)- Kalihim ti KR-CAIN. Natiliw idia Metro Manila ken saanen nga imparang ti Military Intelligence Group ti AFP (1985);

- Teofilo Valencia (Ka Nixon/ Ka Milky)- Kadre ti Partido iti Cagayan; natay iti labanan idia Amulung, Cagayan idi 1996;

- Teresita Cudal (Ka Dolor)- Kameng ti Komiteng Rehiyon ti Cagayan-Apayao (CAPA); pinatay ti impiltrador idia Gonzaga, Cagayan idi 1996;

- Felipe Dugo (Ka Abet/ Ka Peter)- immuna a kumander ti Larangang Yunit Gerilya iti Daya a Cagayan idi 1979; natay iti sakit idia Gonzaga, Cagayan idi 1997;

- Danilo Flores Ben (Ka Nolan/Ka Nani) - Commanding Officer ti Regional Operational Command ti KR-CAPA idi 1986-91 ken kameng ti KTKR-CAPA; natay iti sakit idia Gonzaga, Cagayan idi 1997.

Ti pammadayaw ket indauluan dagiti legal nga organisasion a KARAPATAN, Bagong Alyansang Makabayan, Concerned Students for Justice and Peace - UP ken Amado V.

Hernandez Resource Center. Nadumaduma nga artista iti arte, teatro, ken telebision ti nangiparang kadagiti kanta, drama, daniw ken sala.

Bayat a padpadayawan dagiti umili a Pilipino dagiti martir ken bannuarda, padpadayawan met dagiti agar-ari a dasig ti dati a narungsot nga aso-asoda a ni Heneral Fabian Ver. Intabonda ti bangkay ni Ver idia Sarrat, Ilocos Norte. Ni Ver ket maysa kadagiti katalek a berdugo daydi diktador Marcos. **B**

“Nupay matay amin a tao, daytoy ket mabalin a nadagdagsen pay ngem ti Bantay Thai wenno nalaglag-an pay ngem ti dutdot. Ti matay para kadagiti umili ket nadagdagsen ngem ti Bantay Thai, ngem..... ti matay para kadagiti mananggundaway ken manangirurumen ket nalaglag-an ngem ti dutdot.”

- MAO ZEDONG

Yaw nga mabibbig ay nebalittag ta Ibanag nga Rebolusyonaryong Gabay sa Reporma sa Lupa nga netura ni Amado Guerrero (1977). Meka-appa ngana yaw ta serye.

Rebolusionario Nga Annuttulan Ta Reforma Ta Davvun



MEKALIMA NGA PARTE

Y Pattaraddayan* Na Kusechero Bilang Kooperatiba

Seksion 1. Y pattaraddayan na kusechero ta antas bario anna mas atannang paga taw ay masserbi nga kooperatiba, nga iroluan na marigariga nga kusechero, natangnga-nga-alinno nga kusechero anna makitaddang nga kusechero, fuera nu egga paga y partikular nga pagawagan nga mangitaddag tu kooperatiba nga neruma paga ta pattaraddayan na kusechero.

Seksion 2. Kanayun nga igafu anna itrabaho na pattaraddayan na kuscherro danuri ira pamegafuunan nga forma na kooperasion ta hanay na miembro ira, kagitta na pagguruffuffun anna panattaratili na patrabaho, tapenu metaddag y pammakapianan na ngamin, meyatannang y

produksion, anna mafunakan y pagawag nga gumatu ta usurero ira.

Seksion 3. Bilang kooperatiba, mepalippawa ta pattaraddayan na kusechero nu piga nga sapi onu parte y katali na binni onu kuartu nga mekontribusion na miembro na pattaraddayan. Mittan kada tallu nga vulan, kuantan na pattaraddayan y ngina anna ganansia na sapi. Kada miembro na pattaraddayan ay awayya na gumatang tu maski piga nga sapi kabalinnaga nakatang tu nagannutgutan nga bilang na sapi. Ngem maski no aru y sapi na kada miembro ta kooperatiba, matuttul y patakaran nga "kada miembro, tadday nga botu." Danuri y ari nga kualipikado nga mabbalin nga miembro na pattaraddayan ay mapavulunang mappekkaw lamang tu kapital ta kooperatiba.

*Pavvurulunan onu organisasion kunna karuan

Seksion 4. Danuri y sapi ay meyusa para ta annilaman nga tumunug nga pakeyosanna:

a. tapenu paggatang ira ta ayam nga patrabaho, rumienta nga pakkusecha, rumienta anna pasilidad nga arianna kaya nga gatangan na tadtadday nga tolay onu familia;

b. tapenu mangitaddag tu tienda nga mamakyaw ira tu importante nga gatangan pati binni, abono, pestisidio, nga mabillabillay ta maguili na lokalidad ta presio nga mas alinno anne ta presio na danaw nga magatang ira nu magatang ta tanakuan.

k. tapenu mapakappia y ammong nga pattolayan;

d. tapenu makonnug tu medisina ta gagangay nga taki ira, anna tapenu egga y alanno nga serbisio nga medikal anna dental;

e. tapenu masuporta danuri ira aktibidad ta edukasion anna kultura, anna danuri proyekto anna pasilidad nga para ta pagganassan.

g. tapenu mapakappia danuri ira pasilidad ta transportasion anna komunikasion;

h. tapenu mapagan danuri ira nagastu ta pattanam.

Seksion 5. Siguraduan na pattaraddayan na kusechero tu y produkto na miembro na ay melaku ta kappianan nga presio, anna tukkin na pattaraddayan y pangilloko nga trabaho na komersiante. Danuri ira komersiante ay tunung nga pakipattaraddayan na kusechero, anna mapavulunan ira nga magganansia tu tunung nga ganansia.

Seksion 6. Y pattaraddayan na kusechero ay awayya na nga gumatang tu moderno nga rumienta kagitta na bomba para ta padanum, traktora, anna tilyadora anna makina nga pangkiskis; ngem bago gumatang tu annilaman y pattaraddayan igigiit naw ta danuri ira makakkua ta rumienta nga maddagun nga meyosa tapenu pabbalinadda nga mas mappia anna mas mappo y serbisio.

Seksion 7. Y pattaraddayan na kusechero ay mappagatu ta partikular nga miembro, arianna mattuki tu interes nga mas atannang ta annam nga porsiento kada ragun; anna bilang kolateral ay alawatan na pattaraddayan na kusechero y davvun, y

tumunug nga api, danuri ayam nga pakkusecha, rumienta onu annilaman nga pammakapianan nga personal nga kukua katali na ngina na ginatu. Mappagatu lamang nu y magatu ay para ta produksion onu tanakuan paga nga importante nga keyosanna. Egga y pakawayya na pattaraddayan na kusechero nga imbestigan maski anni nga oras y aktual nga keyosanna na nepagatu.

Seksion 8. Batay ta kongkreto nga kondision, desisionan na pattaraddayan na kusechero nu kunnasi na nga mala uli danuri ira

gastos na, menteneran nga alanno y ganansia, anna magganansia tu alanno gapa ta danuri netannag nga kapital.

Seksion 9. Danuri ira miembro na pattaraddayan na kusechero ay mavvurulun nga manguffun ta danuri ira dependiente na rebolusionario nga martir ira, kadre anna Pulang mandirigma nga makkusecha



ta davvud da onu makala tu tanakuan nga pagalegan onu pattolayan.

Seksion 10. Batay ta prinsipio na kooperatiba ay metaddag y pattaraddayan na kusechero kagitta na pammulatu frutas anna gulay, pammanu (poltri), pabbavi (piggery), manangngaw tu baka, patabla (logging), pakkarpintero, pagikkayu, paggafu tu manango, paf-fishpond, pammadday tu produkto maggafu ta sira (manango kunna karuan), pammadday tu handikrap, paddage, pappanday, transportasion (traysikel, dyip anna barangay nga de-motor), pakkumpuni tu makina ta talyer, anna karuan paga.

Seksion 11. Y pattaraddayan na kusechero ay manga tu davvun tapenu meyosa na kooperatiba, anna egga y kukua nga billayna sangaw nu mabillabillay nga libre y davvun. Danuri ira davvun na kooperatiba ay masserbi nga pabbasehan tapenu magawa y mas atannang nga antas na kooperasion. Y kita naw ay meyosa tapenu magatang y sobra nga davvun na danuri riku ira nga kusechero anna tanakuan paga nga napermisoan nga makapattagikua tu sobra nga davvun, anna tapenu magatang gapa y davvun na danuri benepisiario na reforma ta davvun nga ta annilaman nga makagafu ay ikaya da nga ilako y davvun da.


Seksion 12. Ta pakkusecha ta davvun na kooperatiba, danuri ira miembro na pattaraddayan na kusechero ay egga y papparepareho nga parte ta trabaho anna ta mala nga ganansia. Kunne na gapa, y pattaraddayan na kusechero ay mamadday tu sistema nga puntos ta trabaho tapenu meddan tu mepangngo nga ngina y aktual nga paddumaruma ta kantidad (gukug) anna kalidad na trinabaho na miembro ria. Ta kunnaw nga sistema meyanung y mepappaga ta miembro ira.

Seksion 13. Y pattaraddayan na kusechero na piga nga barrio, ili, distrito, onu probinsia ay awayya na nga madduruffun ta proyekto nga pang-kooperatiba ira, anna yaw ira ay tangngawan na tadday nga komite anna mawag tu aprobaran na mepangngo nga antas na demokratiko nga gobierno na maguili. **B**



PANGMABAYAGAN A GUBAT

KA MERDEKA
DISYEMBRE 1998



Sakbay a simmampa iti NPA iti Isabela ita a 1998, nagtignay ni Ka Merdeka iti sektor ti kabataan-estudiante iti Metro Manila. Karaman kadagiti umad-adu a bilang ti aktibista iti tignayan iti ciudad a lumalaok iti hukbo ti umili ken gubat ti umili iti aw-away.

Pinullon a kalgaw
ken tudtudo ti limmabas,
mano a daras metten
a kimmalub ti ulep
iti raniag nga intulod
ti bulan

ah, mano a tawen metten
ti rebolusion!

adun a biag ti naidaton
sipud pay idi rimsuat daytoy,
mano a daras metten a naitibkol
ngem natibker latta a nakatakder
ken agpabpabaro't pigsa

atiddogen ti intayo dinaliasat
adapon ti intayo nadanon
pinangenan a lapped ti narimbawam
a nangted biag, dara
laing ken regta

nasken kadi pay a sumardeng
wenno aginana iti apagkanito?
Saan.

Gapu ta agtultuloy ti panagsepsep
dagiti agar-ari
awan sarday ti ranggas
ken panagmiraut dagiti masa
a ginamrudan dagiti agindidios iti daga
ken buklis nga usurero

lallalo pay ketdi nga agtultuloy
agpabaro't pigsa
ti henerasion a mabisbisinan
ken ma-waw iti wayawaya a
sumingising
ken rumsuat iti Daya
a mangitulod iti raniag
ti baro a bigat —

ti aldaw ti wayawaya.